

ঔপনিষদ ব্রহ্ম ।

শ্রীরবীন্দ্রনাথ ঠাকুর ।

আদি ব্রাহ্মসমাজ যন্ত্রে

শ্রীমেবেঙ্গনাথ ভট্টাচার্য্য দ্বারা মুদ্রিত


৫৫নং অপার চিংপুর রোড ।

প্রাবণ, ১৩০৮ সাল ।

মূল্য ।০ চারি আনা ।

Out of Period *h*

RARE BOOK



ঐপনিষদ ব্রহ্ম ।



ঐ নমঃ পরমঋষিভ্যো নমঃ পরমঋষিভ্যঃ, পরম ঋষিগণকে নমস্কার করি, পরম ঋষিগণকে নমস্কার করি, এবং অদ্যকার সভায় সমাগত আৰ্য্যামণ্ডলীকে জিজ্ঞাসা করি—ব্রহ্মবাদী ঋষিরা যে, ভারতবর্ষে জন্মগ্রহণ করিয়াছিলেন সে কি এক-বারেই ব্যর্থ হইয়াছে? অথবা আমরা কি তাঁহাদের মহি-মমন্ত বোগ বিচ্ছিন্ন করিয়াছি? ব্রহ্ম হইতে যে জীব পল্লবটি উদ্ভূত পড়ে সেও বৃক্ষের মজ্জার মধ্যে কিঞ্চিৎ প্রাণশক্তির সঞ্চার করিয়া যায়—হৃৎকিরণ হইতে যে তেজটুকু সে সংগ্রহ করে তাহা বৃক্ষের মধ্যে এমন করিয়া নিহিত করিয়া যায় যে মৃত কাষ্ঠও তাহা ধারণ করিয়া রাখে, আর আমাদের ব্রহ্ম-ঋষি ঋষিগণ ব্রহ্ম-স্বয়ালোক হইতে যে পরম তেজ, যে মহান শক্তি আহরণ করিয়াছিলেন তাহা কি এই নানা শাখাপ্রশাখা-ম্পন্ন বনস্পতির—এই ভারতব্যাপী পুরাতন আৰ্য্যজাতির মজ্জার মধ্যে সঞ্চিত করিয়া যান নাই? —

তবে কেন আমরা গৃহে গৃহে আচারে অমুষ্ঠানে কার-মানে বাক্যে তাঁহাদের মহাবাক্যকে প্রতি মুহূর্তে পরিহাস

করিতেছি ? তবে কেন আমরা বলিতেছি, নিরাকার ব্রহ্ম আমাদের জ্ঞানের গম্য নহেন, আমাদের ভক্তির আয়ত্ত নহেন, আমাদের কর্ম্মমুষ্ঠানের লক্ষ্য নহেন ? ঋষিরা কি এ সম্বন্ধে লেশমাত্র সংশয় রাখিয়া গিয়াছিলেন, তাঁহাদের অভিজ্ঞতা কি প্রত্যক্ষ এবং তাঁহাদের উপদেশ কি স্পষ্ট নহে ? তাঁহারা বলিতেছেন—

ইহ চেৎ অবেদীমথ সত্যমস্মি,

মচেৎ ইহাবেদীর্মহতী বিনষ্টিঃ ;

এখানে যদি তাঁহাকে জানা যায় তবেই জন্ম সত্য হয়, যদি না জানা যায় তবে মহতী বিনষ্টিঃ, মহা বিনাশ । অতএব ব্রহ্মকে না জানিলেই নয় । কিন্তু কে জানিয়াছে ? কাহার কথায় আমরা আশ্বাস পাইব ? ঋষি বলিতেছেন—

ইতৈব সন্তোমথ বিদ্বন্তং বসঃ—

নচেৎ অবেদীর্মহতী বিনষ্টিঃ ।

এখানে থাকিয়াই তাঁহাকে আমরা জানিয়াছি, যদি না জানিতাম তবে আমাদের মহতী বিনষ্টি হইত । আমরা কি সেই তত্ত্বদর্শী ঋষিদের সাক্ষ্য আশ্বাস করিব ?

ইহার উত্তরে কেহ কেহ সবিনয়ে বলেন—আমরা আশ্বাস করি না—কিন্তু ঋষিদের সহিত আমাদের অনেক প্রভেদ ; তাঁহারা যেখানে আনন্দে বিচরণ করিতেন আমরা সেখানে নিঃশ্বাস গ্রহণ করতে পারি না । সেই প্রাচীন মহারণ্যবাসী বৃদ্ধ পিপলাদ ঋষি এবং

সুকেশা চ ভারদ্বাজঃ শৈবশ্চ সত্যকামঃ, সৌর্য্যায়নী চ
 গার্গ্যাঃ, কৌশল্যাশ্চান্বলারনো ভার্গবো বৈদর্ভিঃ কবন্ধী
 কাত্যায়নশ্চে হৈতে ব্রহ্মপরা ব্রহ্মনিষ্ঠাঃ পরং ব্রহ্মাদেশ্বমাণাঃ—
 সেই ভারদ্বাজপুত্র সুকেশা, শিবপুত্র সত্যকাম, সৌর্য্যপুত্র
 গার্গ্যা, অধনপুত্র কৌশল্যা, ভৃগুপুত্র বৈদর্ভি, কাত্যায়নপুত্র
 কবন্ধী, সেই ব্রহ্মপর ব্রহ্মনিষ্ঠ পরং ব্রহ্মাদেশ্বমাণ ঋষিপুত্রগণ,
 তাঁহারা সমিৎ হস্তে বনস্পতিচ্ছায়াতলে গুরুসম্মুখে সমাসীন
 হইয়া ব্রহ্মজিজ্ঞাসা করিতেন তাঁহাদের সহিত আমাদের
 সঙ্গনা হয় না ।

না হইতে পারে, ঋষিদের সহিত আমাদের প্রভেদ
 থাকিতে পারে, কিন্তু সত্য এক, ধর্ম এক, ব্রহ্ম এক ;—
 যাহাতে ঋষিজীবনের সার্থকতা, আমাদের জীবনের সার্থ-
 কতাও তাহাতেই ; যাহাতে তাঁহাদের মহতী বিনষ্টি তাহাতে
 আমাদের পরিত্রাণ নাই । শক্তি এবং নিষ্ঠার তারতম্য অনু-
 পারে সত্যে ধর্মে এবং ব্রহ্মে আমাদের ন্যূনাধিক অধিকার
 হইতে পারে কিন্তু তাই বলিয়া অসত্য অধর্ম অব্রহ্ম আমাদের
 অবলম্বনীয় হইতে পারে না । ঋষিদের সহিত আমাদের
 ক্ষমতার প্রভেদ আছে বলিয়া তাঁহাদের অবলম্বিত পথের
 বিপরীত পথে গিয়া আমরা সমান ফল প্রত্যাশা করিতে
 পারি না । যদি তাঁহাদের এই কথা বিশ্বাস কর যে,
 ইহ চেদবেদীদধ সত্যমস্তি, এখানে তাঁহাকে জানিলেই
 জীবন সার্থক হয়—নচেৎ মহতী বিনষ্টিঃ, তবে বিনয়ের সহিত

শ্রদ্ধার সহিত মহাজনপ্রদর্শিত সেই সত্যপথই অবলম্বন করিতে হইবে ।

সত্য ক্ষুদ্র বৃহৎ সকলেরই পক্ষে এক মাত্র এবং ঋষির মুক্তিবিধানের জন্তু যিনি ছিলেন আমাদের মুক্তিবিধানের জন্তুও সেই একমেব অদ্বিতীয়ঃ তিনি আছেন । যাহার পিপাসা অধিক তাঁহার জন্তুও নিঃশূল নির্ঝরিতী অভ্রভেদী শূন্য গিরিশিখর হইতে অহোরাত্র নিঃসান্দিত, আর যাহার অন্নাপ্যাসা এক অঞ্জলি জলেই পরিতৃপ্ত তাঁহার জন্তুও সেই অক্ষয় জলধারা অবিশ্রাম বহমানা,--হে পাত্ৰ, হে গৃহী, যাহার যতটুকু ঘট, লইয়া আইস, যাহার যতটুকু পিপাসা, শান করিয়া যাও !

আমাদের দৃষ্টিশক্তির প্রসার সঙ্কীর্ণ তথাপি সমুদয় সৌর জগতেব একমাত্র উদ্দীপনকারী সূর্য্যই কি আমাদিগকে আলোক বিতরণের জন্তু নাই ? অবরুদ্ধ অন্ধকূপই আমাদের মত ক্ষুদ্রকায়ার পক্ষে যথেষ্ট হইতে পারে তবু কি অনন্ত আকাশ হইতে আমরা বঞ্চিত হইয়াছি ? পৃথিবীর অতি ক্ষুদ্র একাংশ সম্বন্ধে কথঞ্চিৎ জ্ঞান থাকিলেই আমাদের জীবনযাত্রা স্বচ্ছন্দে চলিয়া যায়, তবু কেন মনুষ্য চন্দ্রসূর্য্যগ্রহ-তারার অপরিমেয় রহস্য উদ্ঘাটনের জন্তু অশ্রান্ত কৌতূহলে নিবস্তুর লোকলোকান্তরে আপন গবেষণা প্রেরণ করিতেছে ? আমরা যতই ক্ষুদ্র হই-না কেন .তথাপি ভূমিব স্তম্ভঃ কুমাই আমাদের সুখ, নাহলে সুখমস্তি, অন্নে আমাদের সুখ নাই ।

হঠাৎ মনে হইতে পারে ব্রহ্ম হইতে অনেক অল্পে, পরি-
মিত আকারবদ্ধ আরম্ভগম্য পদার্থে আমাদের মত স্বল্পশক্তি
জীবের সুখে চলিয়া যাইতে পারে—কিন্তু তাহা চলে না ।
ততো যদুত্তরতরং তদরূপমনাময়ং—যিনি উত্তরতর অর্থাৎ
সকলের অতীত, ঐহাকে উত্তীর্ণ হওয়া যায় না, যিনি
ঐশ্বরীর, রোগশোক-রহিত—য এতদ্বিহ্নঃ অমৃতান্তে ভবন্তি
ঐহারা ইহাকেই জানেন তাঁহারাই অমর হন—অথ ইতরে
দুঃখমেব অপিয়ন্তি, আর সকলে কেবল দুঃখই লাভ করেন ।

উপনিষৎ সকলকে আহ্বান করিয়া বলিতেছেন,—

তদেতৎ সত্যং তদমৃতং তদ্বৈদ্যব্যং সোম্য বিদ্ধি ।

তিনি সত্য, তিনি অমৃত, তাঁহাকে বিদ্ধ করিতে হইবে,
হে সোম্য, তাঁহাকে বিদ্ধ কর !

ধনুর্গৃহীত্বৌপনিষদং মহাজ্ঞং—

উপনিষদে যে মহাজ্ঞ ধনুর কথা আছে সেই ধনু গ্রহণ
করিয়া—

শরং হুপাসানিশিতং সঙ্করীত—

উপাসনা দ্বারা শান্ত শর সঙ্কান করিবে !

আয়ম্য তদ্ভাবগতেন চেতসা লক্ষ্যং তদেবাকরং সোম্য বিদ্ধি !

তদ্ভাবগত চিত্তের দ্বারা ধনু আকর্ষণ করিয়া লক্ষ্য-স্বরূপ
সেই অক্ষর ব্রহ্মকে বিদ্ধ কর !

এই উপমাটি অতি সরল । যখন শুভ্র সবলতনু আর্ষ্যাগণ
আদিম ভারতবর্ষের গহন মহারণ্যের মধ্যে প্রবেশ করিয়াছেন,

যখন হিংস্র পশু এবং হিংস্র দস্যুদিগের সহিত তাঁহাদের
প্রাণপণ সংগ্রাম চলিতেছে তখনকার সেই টঙ্কারমুখর
অরণ্যানিবাসী কবির উপযুক্ত এই উপমা !

এই উপমার মধ্যে যেমন সরলতা তেমনি একটি প্রবলতা
আছে। ব্রহ্মকে বিক্র করিতে হইবে - ইহার মধ্যে লেশমাত্র
কুণ্ঠিত ভাব নাই। প্রকৃতির একান্ত সারল্য এবং ভাবে
একাগ্র বেগ না থাকিলে এমন অসঙ্কোচ বাক্য কাহারো
মুখ দিয়া বাহির হইত না। প্রত্যক্ষ অভিজ্ঞতা দ্বারা যাহারা
ব্রহ্মের সহিত অন্তরঙ্গ ঘনিষ্ঠ সম্বন্ধ স্থাপন করিয়াছেন তাঁহা-
রাই এরূপ সাহসিক উপমা এমন সহজ এমন প্রবল সরল-
তার সহিত উচ্চারণ করিতে পারেন। যুগ যেমন ব্যাধের
প্রত্যক্ষ লক্ষ্য, ব্রহ্ম তেমনি আত্মার অনন্য লক্ষ্যস্থল। অপ্র-
মত্তেন বেদব্যং শরবজ্জন্ময়ো ভবেৎ। প্রমাদ-শূন্য হইয়া
তাঁহাকে বিক্র করিতে হইবে এবং শর যেমন লক্ষ্যের মধ্যে
প্রবেশ করিয়া আচ্ছন্ন হইয়া যায় সেইরূপ ব্রহ্মের মধ্যে
ভ্রম হইয়া যাইবে।

উপমাটি যেমন সরল, উপমার বিষয়গত কথাটি তেমনি
গভীর। এখন সে অরণ্য নাই, সে ধমুঃশর নাই; এখন
নিরাপদ নগরনগরী অপরূপ অস্ত্রশস্ত্রে সুরক্ষিত। কিন্তু সেই
আরণ্যক ঋষিকবি যে সত্যকে সন্ধান করিয়াছেন সেই সত্য
ঋষিকার সত্য যুগের পক্ষেও ছলভ। আধুনিক সত্যতা
কামান বন্দুকে, ধমুঃশরকে জিতিয়াছে কিন্তু সেই কত শত

শতাব্দীর পূর্ববর্তী ব্রহ্মজ্ঞানকে পশ্চাতে ফেলিতে পারে নাই । সমস্ত প্রত্যক্ষ পদার্থের মধ্যে তদেতৎ সত্যং সেই যে একমাত্র সত্য, যদ্ অণুভ্যেণুচ, যাহা অণু হইতেও অণু, অথচ যস্মিন্ লোকা নিহিতা লোকিনশ্চ, যাহাতে লোক সকল এবং লোকবাসী সকল নিহিত রহিয়াছে সেই অপ্রত্যক্ষ ঋব সত্যকে শিশুতুল্য সরল ঋষিগণ অতি নিশ্চিতরূপে জানিয়াছেন । তদমৃতং, তাহাকেই তাঁহারা অমৃত বলিয়া ঘোষণা করিয়াছেন এবং শিষ্যকে ডাকিয়া বলিয়াছেন তদ্ভাবগন্তেন চেতনা, তদ্ভাবগত চিন্তের দ্বারা তাঁহাকে লক্ষ্য কর—তদ্ব্যং সোম্য বিদ্ধি, তাঁহাকে বিদ্ধ করিতে হইবে, হে সোম্য তাঁহাকে বিদ্ধ কর ! শরবত্তন্ময়ো ভবেৎ, লক্ষ্যপ্রবিষ্ট শয়ের স্থায় তাঁহারই মধ্যে তন্ময় হইয়া যাও !

সমস্ত আপেক্ষিক সত্যের অতীত সেই পরম সত্যকে কেবলমাত্র জ্ঞানের দ্বারা বিচার করা সেও সামান্য কথা নহে, শুদ্ধ যদি সেই জ্ঞানের অধিকারী হইতেন তবে তাহাতেও সেই স্বপ্নাশী বিরলবসন সরলপ্রকৃতি বনবাসী প্রাচীন আৰ্য্য ঋষিদের বুদ্ধিশক্তির মহৎ উৎকর্ষ প্রকাশ পাইত ।

কিন্তু উপনিষদের এই ব্রহ্মজ্ঞান কেবলমাত্র বুদ্ধিবৃত্তির সাধনা নহে—সকল সত্যকে অতিক্রম করিয়া ঋষি যাহাকে একমাত্র তদেতৎ সত্যং বলিয়াছেন, প্রাচীন ব্রহ্মজ্ঞদের পক্ষে তিনি কেবল জ্ঞানলভ্য একটি দার্শনিক তত্ত্বমাত্র ছিলেন না—একাগ্রচিত্ত ব্যাধের ধনু হইতে শর বেরূপ প্রবলবেগে

প্রত্যক্ষ সন্ধানে লক্ষ্যের দিকে ধাবমান হয়, ব্রহ্মবিদের আত্মা সেই পরম সত্যের মধ্যে প্রবেশ করিয়া তন্ময় হইবার জন্ত সেইরূপ আবেগের সহিত ধাবিত হইত। কেবল মাত্র সত্য নিরূপণ নহে, সেই সত্যের মধ্যে সম্পূর্ণ আত্মসমর্পণ তাঁহাদের লক্ষ্য ছিল।

কারণ, সেই সত্য কেবলমাত্র সত্য নহে, তাহা অমৃত। তাহা কেবল আমাদের জ্ঞানের ক্ষেত্র অধিকার করিয়া নাই, তাহাকে আশ্রয় করিয়াই আমাদের আত্মার অমরত্ব। এই জন্ত সেই অমৃত পুরুষ ছাড়িয়া আমাদের আত্মার অন্বেষণ গতি নাই ঋষিরা ইহা প্রত্যক্ষ জানিয়াছেন এবং বলিয়াছেন—

স বঃ অন্তম্ আত্মনঃ প্রিয়ং ক্রবাণং ক্রমাৎ—

অর্থাৎ যিনি পরমাত্মা ব্যতীত অন্তকে আপনার প্রিয় করিয়া বলেন—প্রিয়ং রোৎস্যতীতি—তাঁহার প্রিয় বিনাশ পাইবে! যে সত্য আমাদের জ্ঞানের পক্ষে সকল সত্যের শ্রেষ্ঠ আমাদের আত্মার পক্ষে তাহাই সকল প্রিয়ের প্রিয়তম;—

তদেতৎ প্রেয়ঃ পুত্রাৎ, প্রেমোবিত্তাৎ, প্রেমোহন্যান্মাৎ সৰ্ব্বান্মাৎ অন্তরতরং যদয়মাত্মা—

এই যে সৰ্ব্বাপেক্ষা অন্তরতর পরমাত্মা ইনি আমাদের পুত্র হইতে প্রিয়, বিত্ত হইতে প্রিয়, অন্য সকল হইতে প্রিয়। তিনি শুধু জ্ঞানমাত্র নহেন, তিনি আমাদের আত্মার প্রিয়তম।

আধুনিক হিন্দু সম্প্রদায়ের মধ্যে ঠাঁহারা বলেন ব্রহ্মকে আশ্রয়-করিয়া কোন ধর্ম সংস্থাপন হইতে পারে না, তাহা কেবল তত্ত্বজ্ঞানীদের অবলম্বনীয়, তাঁহারা উক্ত ঋষিবাক্য স্মরণ করিবেন। ইহা কেবল বাক্যমাত্র নহে,—প্রীতিরসকে অতি নিবিড় নিগূঢ় রূপে আশ্বাদন করিতে না পারিলে এমন উদার উন্মুক্ত ভাবে এমন সরল সবল কর্ণে প্রিয়ের প্রিয়ত্ব ঘোষণা করা যায় না।

তদেতৎ প্রেয়ঃ পুত্রাৎ প্রেয়ো বিত্তাৎ প্রেয়োহনাম্মাৎ সর্বস্মাৎ অন্তরতরং যদয়মাত্মা—

ব্রহ্মর্ষি এ কথা কোন ব্যক্তিবিশেষে বন্ধ করিয়া বলিতে-ছেন না—তিনি বলিতেছেন না, যে, তিনি আমার নিকট আমার পুত্র হইতে-প্রিয়, বিত্ত হইতে প্রিয়, অন্য সকল হইতে প্রিয়—তিনি বলিতেছেন আত্মার নিকটে তিনি সর্বাপেক্ষা অন্তরতর—জীবাশ্বামাত্মেরই নিকট তিনি পুত্র হইতে প্রিয়, বিত্ত হইতে প্রিয়, অন্য সকল হইতে প্রিয়—জীবাশ্বা যখনই তাঁহাকে যথার্থরূপে উপলব্ধি করে তখনি বুঝিতে পারে তাঁহা অপেক্ষা প্রিয়তর আর কিছুই নাই।

অতএব পরমাত্মাকে যে কেবল জ্ঞানের দ্বারা জানিব তদেতৎ সত্যং, তাহা নহে, তাঁহাকে হৃদয়ের দ্বারা অনুভব করিব তদমৃতং। তাঁহাকে সকলের অপেক্ষা অধিক বলিয়া জানিব, এবং সকলের অপেক্ষা অধিক বলিয়া প্রীতি করিব। জ্ঞান ও প্রেম সমেত আত্মাকে ব্রহ্মে সমর্পণ করার সাধনাই

ব্রাহ্মধর্মের সাধনা—তদ্ভাবগতেন চেতনা এই সাধনা করিতে হইবে ; ইহা নীরস তত্ত্বজ্ঞান নহে, ইহা ভক্তিপ্রতিষ্ঠিত ধর্ম ।

ঔপনিষদের ঋষি যে জীবাত্মাত্মেরই নিকট পরমাত্মাকে সর্বাপেক্ষা প্রীতিজনক বলিতেছেন তাহার অর্থ কি ? যদি তাহাই হইবে তবে আমরা তাঁহাকে পরিত্যাগ করিয়া ভ্রাম্য-মান হই কেন ? একটি দৃষ্টান্ত দ্বারা ইহার অর্থ বুঝাইতে ইচ্ছা করি ।

কোন রসজ্ঞ ব্যক্তি যখন বলেন কাব্যরসাবতারগার বাগ্মীকি শ্রেষ্ঠ কবি—তখন একথা বুঝিলে চলিবে না যে কেবল তাঁহারই নিকট বাগ্মীকির কাব্যরস সর্বাপেক্ষা উপা-দেয় । তিনি বলেন সকল পাঠকের পক্ষেই এই কাব্যরস সর্বশ্রেষ্ঠ—ইহাই মনুষ্য-প্রকৃতি । কিন্তু কোন অশিক্ষিত গ্রাম্য জ্ঞানপদ বাগ্মীকির কাব্য অপেক্ষা যদি স্থানীয় কোন পাঁচালি গানে অধিক সুখ অনুভব করে তবে তাহার কারণ তাহার অজ্ঞতামাত্র । সে লোক অশিক্ষা বশতঃ বাগ্মীকির কাব্য যে কি তাহা জানে না, এবং সেই কাব্যের রস যেখানে, অনভিজ্ঞতা বশতঃ সেখানে সে প্রবেশ লাভ করিতে পারে না—কিন্তু তাহার অশিক্ষাবাধা দূর করিয়া দিবামাত্র যখন সে বাগ্মীকির কাব্যের মধ্যার্থ পরিচয় পাইবে তখন সে স্বভাবতই মানবপ্রকৃতির নিজগুণেই গ্রাম্য পাঁচালি অপেক্ষা বাগ্মীকির কাব্যকে রমণীয় বলিয়া জ্ঞান করিবে । তেমনি যে ঋষি ব্রহ্মের অমৃতরস আন্বাদন করিয়াছেন, যিনি

ঐহাকে পৃথিবীর জন্ত সকল হইতেই প্রিয় বলিয়া জানিয়াছেন, তিনি ইহা সহজেই বুঝিয়াছেন যে ব্রহ্ম স্বভাবতই আত্মার পক্ষে সর্বাপেক্ষা প্রীতিদায়ক—ব্রহ্মের প্রকৃত পরিচয় পাইবামাত্র আত্মা স্বভাবতই ঐহাকে পুত্র, বিত্ত ও অন্য সকল হইতেই প্রিয়তম বলিয়া বরণ করে ।

ব্রহ্মের সহিত এই পরিচয় যে কেবল আত্মার আনন্দ সাধনের জন্ত তাহা নহে, সংসারবাত্মার পক্ষেও তাহা না হইলে নয় । ব্রহ্মকে যে ব্যক্তি বৃহৎ বলিয়া না জানিয়া সংসারকেই বৃহৎ বলিয়া জানে সংসারবাত্মা সে সহজে নির্বাহ করিতে পারে না,—সংসার তাহাকে রাক্ষসের ন্যায় [গ্রাস করিয়া নিজের জঠরানলে দগ্ধ করিতে থাকে !

এই জন্য ঐশ্যোপনিষদে লিখিত হইয়াছে—

ঐশ্যবাস্তুমিদং সর্বং যৎকিঞ্চ জগত্যাং জগৎ—

ঐশ্বরের দ্বারা এই জগতের সমস্ত যাহা কিছু আচ্ছন্ন জানিবে এবং—

তেন ত্যক্তেন ভূঞ্জীথা মাগৃধঃ কস্যস্বিন্দনং

ঐহার দ্বারা যাহা দত্ত, যাহা কিছু তিনি দিতেছেন তাহাই ভোগ করিবে পরের ধনে লোভ করিবে না ।

সংসারবাত্মার এই মন্ত্র । ঐশ্বরকে সর্বত্র দর্শন করিবে, ঐশ্বরের দত্ত আনন্দ-উপকরণ উপভোগ করিবে, লোভের দ্বারা পরকে পীড়িত করিবে না ।

যে ব্যক্তি ঐশ্বরের দ্বারা সমস্ত সংসারকে আচ্ছন্ন দেখে

সংসার তাহার নিকট একমাত্র মুখ্যবস্তু নহে। সে ষাছা ভোগ করে তাহা ঈশ্বরের দান বলিয়া ভোগ করে—সেই ভোগে সে ধর্মের সীমা লঙ্ঘন করে না—নিজের ভোগমস্ত-তায় পরকে পীড়া দেয় না। সংসারকে যদি ঈশ্বরের দ্বারা আবৃত না দেখি, সংসারকেই যদি একমাত্র মুখ্য লক্ষ্য বলিয়া জানি তবে সংসারস্বত্বের জন্য আমাদের লোভের অন্ত থাকে না, তবে প্রত্যেক তুচ্ছ বস্তুর জন্য হানাহানি কাড়াকাড়ি পড়িয়া যায়, দুঃখ হলাহল মথিত হইয়া উঠে। এই জন্য সংসারীকে একান্ত নির্ভীর সহিত সর্বব্যাপী ব্রহ্মকে অবলম্বন করিয়া থাকিতে হইবে—কারণ সংসারকে ব্রহ্মের দ্বারা বেষ্টিত জানিলে এবং সংসারের সমুস্ত ভোগ ব্রহ্মের দান বলিয়া জানিলে তবেই কল্যাণের সহিত সংসারযাত্রা নির্বাহ সম্ভব হয়।

পরের শ্লোকে বলিতেছেন:—

কুর্স্নেবেহ কর্মাণি জিজীবিষেচ্ছতং সখাঃ

এবং স্বয়ং নাশ্রুণেতোহস্তি ন কন্ম লিপ্যাতে নরে ।

কন্ম করিয়া শত বৎসর ইহলোকে জীবিত থাকিতে ইচ্ছা করিবে,—হে নর, তোমার পক্ষে ইহার আর অন্তথা নাই, কন্মে লিপ্ত হইবে না এমন পথ নাই।

কন্ম করিতেই হইবে এবং জীবনের প্রতি উদাসীন হইবে না—কিন্তু ঈশ্বর সর্বত্র আচ্ছন্ন করিয়া আছেন ইহাই স্মরণ করিয়া কন্মের দ্বারা জীবনের শতবর্ষ ধাপন করিবে।

ঈশ্বর সর্বত্র আছেন অল্পভব করিয়া ভোগ করিতে হইবে এবং ঈশ্বর সর্বত্র আছেন অল্পভব করিয়া কৰ্ম করিতে হইবে ।

সংসারের সমস্ত কৰ্তব্য পরিত্যাগ করিয়া কেবল ব্রহ্মে নিরত থাকা তাহাও ঈশ্যোপনিষদের উপদেশ নহে—

অক্ষং তমঃ প্রবিশন্তি যে অবিষ্টানুপাসতে ।

ততোভূয়ইব তে তমো য উ বিষ্টায়াং রতাঃ ।

যাহারা কেবলমাত্র অবিষ্টা অর্থাৎ সংসারকৰ্মেরই উপাসনা করে তাহারা অক্ষতমসের মধ্যে প্রবেশ করে—তদপেক্ষা ভূয় অক্ষকারের মধ্যে প্রবেশ করে যাহারা কেবলমাত্র ব্রহ্ম-বিষ্টায় নিরত ।

ঈশ্বর আমাদেরকে সংসারের কৰ্তব্য কৰ্মে স্থাপিত করিয়াছেন । সেই কৰ্ম যদি আমরা ঈশ্বরের কৰ্ম বলিয়া না জানি, তবে পরমার্থের উপরে স্বার্থ বলবান হইয়া উঠে এবং আমরা অক্ষকারে পতিত হই । অতএব কৰ্মকেই চরম লক্ষ্য করিয়া কৰ্মের উপাসনা করিবে না, তাহাকে ঈশ্বরের আদেশ বলিয়া পালন করিবে ।

কিন্তু বরঞ্চ মুগ্ধভাবে সংসারের কৰ্ম নির্বাহও ভাল তথাপি সংসারকে উপেক্ষা করিয়া সমস্ত কৰ্ম পরিহার পূৰ্বক কেবল মাত্র আত্মার আনন্দ সাধনের জন্ত ব্রহ্মসন্তোগের চেষ্টা শ্রেয়স্কর নহে । তাহা আধ্যাত্মিক বিলাসিতা, তাহা ঈশ্বরের সেবা নহে ।

কৰ্ম সাধনাই একমাত্র সাধনা। সংসারের উপযোগিতা সংসারের তাৎপর্যই তাই। মঙ্গলকৰ্ম সাধনেই আমাদের স্বার্থ প্রবৃত্তি সকল ক্ষয় হইয়া আমাদের লোভ মোহ আদর হৃদয়গত বন্ধন সকলের মোচন হইয়া থাকে—আমাদের যে যিগু সকল মৃত্যুর মধ্যে আমরাগিকে জড়িত করিয়া রাখে সেই মৃত্যুপাশ অবিশ্রাম মঙ্গল কৰ্মের সংঘর্ষেই ছিন্ন হইয়া যায়। কর্তব্য কৰ্মের সাধনাই স্বার্থপাশ হইতে মুক্তির সাধনা,—এবং যদি নাশ্বথেতোহস্তি ন কৰ্ম লিপ্যতে নরে— ইহার আর অন্যথা নাই—কৰ্মে লিপ্ত হইবে না এমন পথ নাই।

বিজ্ঞাঞ্চাবিজ্ঞাঞ্চ যন্তুচ্ছেদোভয়ং সহ

অবিজ্ঞয়া মৃত্যুং তীৰ্থা বিদ্যায়ামৃতমশ্নুতে ।

বিদ্যা এবং অবিদ্যা উভয়কে বিনি একত্র করিয়া জানেন তিনি অবিদ্যা অর্থাৎ কৰ্ম দ্বারা মৃত্যু হইতে উত্তীর্ণ হইয়া ব্রহ্মলাভের দ্বারা অমৃত প্রাপ্ত হন।

ইহাই সংসারকৰ্মের মূলমন্ত্র—কৰ্ম এবং ব্রহ্ম, জীবনে উভয়ের সামঞ্জস্য সাধন। কৰ্মের দ্বারা আমরা ব্রহ্মের অত্রভেদী মন্দির নিৰ্মাণ করিতে থাকিষ, জ্ঞান সেই মন্দির পরিপূর্ণ করিয়া বিরাজ করিতে থাকিবেন। নহিলে কিসের জন্ম আমরা ইন্দ্রিয়গ্রাম পাইয়াছি, কেন এই পেশী, এই ন্নাবু, এই ষ্ণাহবল, এই বুদ্ধিবৃত্তি, কেন এই স্নেহশ্রোম দয়া/কেন এই বিচিত্র সংসার? ইহার কি কোন অর্থ নাই? ইহা কি

সমস্তই অনর্থের হেতু ? ব্রহ্ম হইতে সংসারকে বিচ্ছিন্ন করিয়া জানিলেই তাহা অনর্থের নিদান হইয়া উঠে এবং সংসার হইতে ব্রহ্মকে দূরে রাখিয়া তাঁহাকে একাকী সম্বোগ করিতে চেষ্টা করিলেই আমরা আধ্যাত্মিক স্বার্থপরতার নিমগ্ন হইয়া জীবনের বিচিত্র সার্থকতা হইতে ভ্রষ্ট হই ।

পিতা আমাদিগকে বিদ্যালয়ে পাঠাইয়াছেন, সেখানকার নিয়ম এবং কর্তব্য সর্ব্বথা সুখজনক নহে । সেই ছুঃখের হাত হইতে নিষ্কৃতি পাইবার জন্ত বালক পিতৃ-গৃহে পলাইয়া আনন্দলাভ করিতে চায় । সে বোধে না বিদ্যালয়ে তাহার কি প্রয়োজন—সেখান হইতে পলায়নকেই সে মুক্তি বলিয়া জ্ঞান করে, কারণ পলায়নে আনন্দ আছে । মনোযোগের সহিত বিদ্যা সম্পন্ন করিয়া বিদ্যালয় হইতে মুক্তিলাভের যে আনন্দ তাহা সে জানে না । কিন্তু সুছাত্র প্রথমে গিতার স্নেহ সর্ব্বনাশ করিয়া বিদ্যাশিক্ষার ছুঃখকে গণ্য করে না, পরে বিদ্যাশিক্ষায় অগ্রসর হইবার আনন্দে সে ভ্রষ্ট হয়—অবশেষে কৃতকার্য হইয়া মুক্তিলাভের আনন্দে সে ধস্ত হইয়া থাকে ।

যিনি আমাদিগকে সংসারে প্রেরণ করিয়াছেন সংসার-বিদ্যালয়কে অবিশ্বাস করিয়া তাঁহাকে ঘেন সন্দেহ না করি—এখানকার ছুঃখকাঠিন্ত বিনীতভাবে গ্রহণ করিয়া এখানকার কর্তব্য একান্তচিত্তে পালন করিয়া পরিপূর্ণ জীবনের মধ্যে ব্রহ্মমুত লাভের সার্থকতা ঘেন অসুভব করি । জীবনকে

সর্বত্র বিরাজমান জানিয়া সংসারের সমস্ত কর্তব্য সম্পন্ন করিয়া যে মুক্তি তাহাই মুক্তি । সংসারকে অপমান পূর্বক পলায়নে যে মুক্তি তাহা মুক্তির বিড়ম্বনা—তাহা একজাতীয় স্বার্থপরতা ।

সকল স্বার্থপরতার চূড়ান্ত এই আধ্যাত্মিক স্বার্থপরতা । কারণ সংসারের মধ্যে এমন একটি অপূর্ব কৌশল আছে যে, স্বার্থ সাধন করিতে গেলেও পদে পদে স্বার্থত্যাগ করিতে হয় । সংসারে পরের দিকে একেবারে না তাকাইলে নিজের কার্যের ব্যাঘাত ঘটে । নৌকা যেমন গুণ দিয়া টানে তেমনি সংসারের স্বার্থবন্ধন আমাদিগকে ইচ্ছায় অনিচ্ছায় সর্বদাই প্রতিকূল শ্রোত বাহিয়া নিজের দিক হইতে পরের দিকে আকর্ষণ করিতে থাকে । আমাদের স্বার্থ ক্রমশই আমাদের সন্তানের স্বার্থ, পরিবারের স্বার্থ, প্রতিবেশীর স্বার্থ, স্বদেশের স্বার্থ এবং সর্বজনের স্বার্থে অবশুস্তাবীরূপে ব্যাপ্ত হইতে থাকে ।

কিন্তু যাহারা সংসারের হুঃখ শোক দারিদ্র্য হইতে পরি-
ত্ৰাণ পাইবার প্রলোভনে আধ্যাত্মিক বিলাসিতায় নিমগ্ন হন
তাঁহাদের স্বার্থপরতা সর্বপ্রকার আঘাত হইতে সুরক্ষিত
হইয়া সুদৃঢ় হইয়া উঠে ।

বৃক্ষে যে ফল থাকে সে ফল বৃক্ষ হইতে রস আকর্ষণ
করিয়া পরিপক হইয়া উঠে । যতই সে পরিপক হইতে থাকে
ততই বৃক্ষের সহিত তাহার বৃন্তবন্ধন শিথিল হইয়া আসে—

অবশেষে তাহার অভ্যন্তরস্থ বীজ সুপরিণত হইয়া উঠিলে বৃক্ষ হইতে সে সহজেই বিচ্ছিন্ন হইয়া বীজকে সার্থক করিয়া ত্রোলে । আমরাও সংসারবৃক্ষ হইতে সেইরূপ বিচিত্র রস আকর্ষণ করি—মনে হইতে পারে তাহাতে সংসারের সহিত আমাদের সম্বন্ধ ক্রমেই দৃঢ় হইবে—কিন্তু তাহা নহে,—আত্মার যথার্থ পরিণতি হইলে বন্ধন আপনি শিথিল হইয়া আসে । ফলের সহিত আমাদের প্রত্যেক এই যে, আত্মা সচেতন ; রস নির্বাচন ও আকর্ষণ বহুল পরিমাণে আমাদের স্বায়ত্ত । আত্মার পরিণতির প্রতি লক্ষ্য করিয়া বিচার পূর্বক সংসার হইতে রস গ্রহণ ও বর্জন করিতে পারিলেই সংসারের উদ্দেশ্য সফল হয় এবং সেই সঙ্গে আত্মার সফলতা সম্পন্ন হইলে সংসারের কল্যাণবন্ধন সহজেই শিথিল হইয়া আগে । অতএব ঈশ্বরের দ্বারা সমস্ত আচ্ছন্ন জানিয়া সংসারকে তেন ত্যক্তেন ভূঞ্জীথা, তাঁহার দত্ত সুখ সমৃদ্ধির দ্বারা ভোগ করিবে—সংসারকে শেষ পরিণাম বলিয়া ভোগ করিতে চেষ্টা করিবে না । অপর পক্ষে সংসারের বৃন্তবন্ধন বলপূর্বক বিচ্ছিন্ন করিয়া তাহার মঙ্গলরস হইতে আত্মাকে বাঞ্ছিত করিবে না । ঈশ্বর এই সংসারবৃক্ষের সহস্র তন্তুর মধ্য দিয়া আমাদের আত্মায় কল্যাণরস প্রেরণ করেন ; এই জীবধার-য়িত্তা বিপুল বনস্পতি হইতে দস্তভরে পৃথক হইয়া নিজের রস নিজে যোগাইবার ক্ষমতা আমাদের হস্তে নাই ।

কোন সত্যকে অস্বীকার করিয়া আমাদের নিস্তার নাই ।

মত্ততার বিহ্বলতায় মাতাল বিশ্বসংসারকে নগণ্য করিয়া যে অন্ধ আনন্দ উপভোগ করে সে আনন্দের শ্রেয়স্করতা নাই। বিদ্যা এবং অবিদ্যা, সৎ এবং অসৎ, ব্রহ্ম এবং সংসার উভয়েই স্বীকার করিতে হইবে। ছঃখের হাত এড়াইবার জন্য কর্তব্য বন্ধন ছেদন করিবার অভিপ্রায়ে সংসারকে একেবারেই “না” করিয়া দিয়া একাকী আনন্দ সম্বোগে প্রবৃত্ত হওয়া একজাতীয় প্রমত্ততা। সত্যের একদিককে উপেক্ষা করিলে অপর দিকও অসত্য হইয়া উঠে। ঈশ্বরের আদেশ পালনকে যে অস্বীকার করে, সে মুখে যাহাই বলুক ঈশ্বরকে সম্পূর্ণ স্বীকার করে না। বরঞ্চ ঈশ্বরকে মুখে অস্বীকার করিয়া যে ব্যক্তি মনুষ্যের প্রতি কর্তব্যানুষ্ঠান করে সে কঠিন কৰ্ম্মের দ্বারা ঈশ্বরকে স্বীকার করিয়া থাকে।

জ্ঞানে এবং ভোগে এবং কৰ্ম্মে ব্রহ্মকে স্বীকার করিলেই তাঁহাকে সম্পূর্ণভাবে স্বীকার করা হয়। সেইরূপ সর্কাজীন-ভাবে ব্রহ্মকে উপলব্ধি করিবার একমাত্র স্থান এই সংসার— আমাদের এই কৰ্ম্মক্ষেত্র; ইহাই আমাদের ধৰ্ম্মক্ষেত্র, ইহাই ব্রহ্মের মন্দির। এখানে জগৎমণ্ডলের জ্ঞানে ঈশ্বরের জ্ঞান, জগৎ সৌন্দর্য্যের ভোগে ঈশ্বরের ভোগ এবং জগৎসংসারের কৰ্ম্মে ঈশ্বরের কৰ্ম্ম জড়িত রহিয়াছে;—সংসারের সেই জ্ঞান সৌন্দর্য্য ও ক্রিয়াকে ব্রহ্মের দ্বারা বেষ্টিত করিয়া জানিলেই ব্রহ্মকে অন্তরতর করিয়া জানা যায় এবং সংসারযাত্রাও কল্যাণকর হইয়া উঠে। তখন ত্যাগ এবং ভোগের সামঞ্জস্য

হয়, কাহারও ধনে লোভ থাকে না, অনর্থক বলিয়া জীবনের
প্রতি উপেক্ষা জন্মে না, শতবর্ষ আয়ু যাপন করিলেও পর-
মান্থুর সার্গকতা উপলব্ধি হয়—এবং সেই অবস্থায়

যন্ত সৰ্ব্বাণি ভূতানি আত্মশ্ৰেবাহুপশ্চতি,

সৰ্ব্বভূতেষু চাত্মানং ততো ন বিজুগুপ্সতে ।

যিনি সমস্ত ভূতকে পরমান্মার মধ্যে দেখেন, এবং সৰ্ব্ব ভূতের
মধ্যে পরমান্মাকে দেখেন তিনি কাহাকেও ঘৃণা করেন না ।

গম্যস্থানের পক্ষে পথ যেমন একইকালে পরিহার্য্য এবং
অবলম্বনীয় ব্রহ্মলাভের পক্ষে সংসার সেইরূপ । পথকে
যেমন আমরা প্রতিপদে পরিত্যাগ করি এবং আশ্রয় করি
সংসারও সেইরূপ আমাদের প্রতিপদে বর্জনীয় এবং গ্রহণীয় ।
পথ নাই বলিয়া চক্ষু মুদ্রিয়া পথপ্রান্তে পড়িয়া স্বপ্ন দেখিলে
গৃহ লাভ হয় না—এবং পথকেই শেষ লক্ষ্য বলিয়া বসিয়া
থাকিলে গৃহে গমন ঘটে না । গম্যস্থানকে যে ভাল বাসে,
পথকেও সে ভালবাসে ; পথ গম্যস্থানেরই অঙ্গ, অংশ এবং
আরম্ভ বলিয়া গণ্য । ব্রহ্মকে যে চায়, ব্রহ্মের সংসারকে সে
উপেক্ষা করিতে পারে না—সংসারকে সে প্রীতি করে এবং
সংসারের কৰ্ম্মকে ব্রহ্মের কৰ্ম্ম বলিয়াই জানে ।

আর্য্যধর্ম্মের বিগুরু আদর্শ হইতে যাঁহারা ভ্রষ্ট হইয়াছেন
তাঁহারা বলিবেন সংসারের সহিত যদি ব্রহ্মের যোগ সাধন
করিতে হয় তবে ব্রহ্মকে সংসারের উপযোগী করিয়া গড়িয়া
লইতে হইবে । তাই যদি হইল তবে সত্যের প্রয়োজন কি ?

সংসার ত আছেই—কাল্পনিক সৃষ্টির দ্বারা সেই সংসারেরই
আয়তন বিস্তার করিয়া লাভ কি ? আমরা অসৎ সংসারে
আছি বলিয়াই আমাদের সত্যের প্রয়োজন, আমরা-সংসারী
বলিয়াই সেই সংসারাতাত নির্বিকার অক্ষর পুরুষের আদর্শ
উজ্জ্বল করিয়া রাখিতে হইবে—সে আদর্শ বিকৃত হইতে
দিলেই তাহা সছিদ্র তরণীব স্থায় আমাদেরই বিনাশ হইতে
উত্তীর্ণ হইতে দেয় না । যদি সত্যকে, জ্যোতিকে, অমৃতকে
আমরা অসৎ, অন্ধকার এবং মৃত্যুর পরিমাপে ধরুক করিয়া
আনি, তবে কাহাকে ডাকিয়া কহিব

অসতো মা সদগময়, তমসো মা জ্যোতির্গময়, মৃত্যো
ম্লামৃতং গময় ?

সংসারী জীবের পক্ষে একটি মাত্র প্রার্থনা আছে—সে প্রার্থনা
অসৎ হইতে আমাকে সত্যে লইয়া যাও অন্ধকার হইতে
আমাকে জ্যোতিতে লইয়া যাও, মৃত্যু হইতে আমাকে
অমৃত্তে লইয়া যাও । সত্যকে মিথ্যা করিয়া লইয়া
তাহার নিকট সত্যের জ্ঞান ব্যাকুলতা প্রকাশ চলে না,
জ্যোতিকে স্বেচ্ছাকৃত কল্পনার দ্বারা অন্ধকারে আচ্ছন্ন করিয়া
তাহার নিকট আলোকের জ্ঞান প্রার্থনা বিড়ম্বনা মাত্র, অমৃ-
তকে স্বহস্তে মৃত্যুধর্মের দ্বারা বিকৃত করিয়া তাহার নিকট
অমৃতের প্রত্যাশা মূঢ়তা । ঈশাবাস্তমিদং সর্বং যৎকিঞ্চ
জগত্যাং জগৎ—যে ব্রহ্ম সমস্ত জগতের সমস্ত পদার্থকে

Handwritten: ১১০৬, ১১. ৪ ৭. ০৭

আচ্ছন্ন করিয়া বিরাজ করিতেছেন সংসারী সেই ব্রহ্মকেই দর্শিত্ব অনুভব করিবেন উপনিষদের এই অনুশাসন ।

দ্বিধাগ্রস্ত ব্যক্তি বলিবেন, উপদেশ সত্য হইতে পারে কিন্তু তাহা পালন কঠিন । অরূপ ব্রহ্মের মধ্যে দুঃখ শোকের নির্দীপন সহজ নহে । কিন্তু যদি সহজ না হয় তবে দুঃখ নির্দীপনের, মুক্তি লাভের অথ যে কোন উপায় আরও কঠিন—কঠিন কেন অসাধ্য । স্বতঃপ্রবাহিত অগাধ শ্রোত-স্বিনীর মধ্যে অবগাহন জ্ঞান যদি কঠিন হয় তবে স্বহস্তে ক্ষুদ্রতম কুপ খনন করিয়া তাহার মধ্যে অবতরণ আরও কত কঠিন—তাই বা কেন, নিজের ক্ষুদ্র কলস-পরিমিত জল নদী হইতে বহন করিয়া জ্ঞান করা সেও দুর্লভতর । যখন ব্রহ্মকে অরূপ অনন্ত অনির্দ্বন্দ্বীয় বলিয়া জানি তখনি তাঁহার মধ্যে সম্পূর্ণ আত্মবিসর্জজন অতি সহজ হয়—তখনি তাঁহার দ্বারা পবিপূর্ণ রূপে পরিবৃত্ত হইয়া আমাদের ভয় দুঃখ শোক সর্ব্বাংশে দূর হইয়া যায় । এই জগ্গই উপনিষদে আছে—

যতোবাচো নিবর্তন্তে অপ্রাপ্য মনসা সহ,

আনন্দং ব্রহ্মণো বিদ্বান্ ন বিভোতি কুতশ্চন,—

মনের সহিত বাক্য বাহাকে না পাইয়া নিবৃত্ত হইয়া আসে সেই ব্রহ্মের আনন্দ যিনি জানিয়াছেন তিনি আর কাহা হইতেও ভয় পান না । অতএব ব্রহ্মের সেই বাক্যমনের অগোচর অনন্ত পরিপূর্ণতা উপলব্ধি করিলে তবেই আমাদের ভয় দুঃখ নিঃশেষে নিরস্ত হয় । তাঁহাকে বিশ্বজগতের অত্যাশ্র

বস্তুর জ্ঞায় বাঙমনোগোচর-সুদূর করিয়া খণ্ড করিয়া দেখিলে আমরা সেই পরম অভয়, সেই ভূমা আনন্দ লাভ করিতে পারি না। আমরা ত সংসারের সঙ্কীর্ণতা-দ্বারা প্রতিহত, জটিলতা দ্বারা উদ্ভ্রান্ত, খণ্ডতা দ্বারা শতধা-বিক্লিপ্ত হইয়া আছি,—আমরা জানি সংসারের “শ্রোতাংসি সর্বাণি ভয়া-বহানি,” সংসারের সমুদয় শ্রোত ভয়াবহ—সকলেরই মধ্যে ভয়হুঃখক্লেশ জরামৃত্যুবিচ্ছেদের কারণ রহিয়াছে;—অতএব আমরা যখন শান্তি চাই, অভয় চাই, আনন্দ চাই, অমৃত চাই তখন সহজেই স্বভাবতই কাহাকে চাই? যাহাকে পাইলে শাস্তিমত্যস্তমেতি, অত্যন্ত শান্তি পাওয়া যায়। তিনি কে? উপনিষৎ বলেন স বৃক্ষকালাকৃতিভিঃ পরোহত্নঃ তিনি সংসার, কাল এবং আকৃতি অর্থাৎ সাকার পদার্থ হইতে পরঃ, শ্রেষ্ঠ, এবং অত্নঃ অর্থাৎ ভিন্ন। যদি তিনি সংসার, কাল, ও সাকার পদার্থ হইতে শ্রেষ্ঠ এবং ভিন্ন না হইতেন তবে ত সংসারই আমাদের যথেষ্ট ছিল—তবে ত তাঁহাকে অন্বেষণ করিবার প্রয়োজন ছিল না।

বিশ্বৈক্যং পরিবেষ্টিতারং জ্ঞাত্বা শিবং শাস্তিমত্যস্তমেতি ।

বিশ্বের একমাত্র পরিবেষ্টিতাকে জানিয়া অত্যন্ত শিব এবং অত্যন্ত শান্তি পাওয়া যায়। অতএব যাহারা বলেন আমরা সেই ভূমা স্বরূপকে আয়ত্ত করিতে পারি না সেই জন্য তাঁহাতে আমাদের স্থিতি আমাদের শান্তি নাই তাঁহারা উপনিষৎকথিত পরম সত্য হইতে স্ব লিত হইতেছেন—

যতোবার্ণো নিবর্তন্তে অপ্রাপ্ত মনসা সহ, আনন্দং ব্রহ্মণো-
বিহ্বান্ ন বিভেতি কদাচন ।

বাক্য মন যাঁহাকে আয়ত্ত করিতে পারে না তাঁহাতেই
আমাদের পরম আনন্দ, আমাদের অনন্ত অভয় । ঋষিরা
কহিতেছেন,

যৎ বাচা নাভ্যাদিতং যেন বাক্ অভ্যাস্ততে
তদেব ব্রহ্ম স্বং বিজিৎ নেদং যদিদমুপাসতে—

যিনি বাক্য দ্বারা উদিত নহেন, বাক্য যাঁহার দ্বারা
উদিত, তিনিই ব্রহ্ম, তাঁহাকে তুমি জান, এই যাঁহা কিছু
উপাসনা করা যায় তাহা ব্রহ্ম নহে ।

যন্নমনসা ন মহুতে যেনাহর্মনোমতম্

তদেব ব্রহ্ম স্বং বিজিৎ নেদং যদিদ মুপাসতে—

মনের দ্বারা যাঁহাকে মনন করা যায় না, যিনি মনকে
জানেন, তিনিই ব্রহ্ম, তাঁহাকে তুমি জান, এই যাঁহা কিছু
উপাসনা করা যায় তাহা ব্রহ্ম নহে । যাঁহাকে বলা যায় না,
যাঁহাকে ভাবা যায় না তাঁহাকেই জানিতে হইবে । কিন্তু
তাঁহাকে সম্পূর্ণ জানা সম্ভব নহে—যদি তাঁহাকে সম্পূর্ণ জানা
সম্ভব হইত তবে তাঁহাকে জানিয়া আমাদের আনন্দাদ্যুত
লাভ হইত না । তাঁহাকে আমরা অন্তরাঙ্গার মধ্যে এত-
টুকু জানি যাঁহাতে বুঝিতে পারি তাঁহাকে জানিয়া শেষ করা
যায় না এবং তাঁহাতেই আমাদের আনন্দের শেষ থাকে
না ।

নাহং মন্ত্রে স্তবেদেতি নো ন বেদেতি বেদচ,

যো নস্তদ্বেদ তদ্বেদ নো ন বেদেতি বেদচ—

ঐহাকে সম্পূর্ণরূপে জানি এমন আমি মনে করি না, না জানি যে তাহাও নহে, আমাদের মধ্যে যিনি ঐহাকে জানেন তিনি ইহা জানেন যে, ঐহাকে জানি এমনও নহে, না জানি এমনও নহে ।

শিশু কি তাহার মাতার সম্যক পরিচয় জানে ? কিন্তু সে অমৃতবের দ্বারা এবং এক অপূর্ব সংস্কার দ্বারা এটুকু ক্রম জানিয়াছে যে তাহার ক্ষুধার শান্তি, তাহার ভয়ের নিবৃত্তি, তাহার সমস্ত আরাম মাতার নিকট । সে তাহার মাতাকে জানে এবং জানেও না । মাতার অপরিপূর্ণ স্নেহ সম্পূর্ণ আয়ত্ত করিবার সাধ্য তাহার নাই, কিন্তু যতটুকুতে তাহার তৃপ্তি ও শান্তি ততটুকু সে আশ্বাদন করে এবং আশ্বাদন করিয়া ফুরাইতে পারে না । আমরাও সেইরূপ ব্রহ্মকে এই জগতের মধ্যে এবং আপন অন্তরাশ্রয় মধ্যে কিছু জানিতে পারি এবং সেইটুকু জানাতেই ইহা জানি যে, ঐহাকে জানিয়া শেষ করা যায় না ; জানি যে, ঐহা হইতে বাচো নিবর্ত্তস্তে অপ্রাপ্য মনসা সহ, এবং মাতৃ-অঙ্কামী শিশুর মত ইহাও জানিতে পারি যে, আনন্দং ব্রহ্মণো বিদ্বান্ ন বিভেতি কদাচন—ঐহা আর আনন্দ যে পাইয়াছে তাহার আর কাহারও নিকট হইতে কদাচ কোন ভয় নাই ।

যাহারা উপনিষৎ অবিশ্বাস করিয়া ঋষিবাক্য অমার্জ

করিয়া ব্রহ্মলাভের সহজ উপায়স্বরূপ সাকার পদার্থকে অবলম্বন করেন তাঁহারা একথা বিচার করিয়া দেখেন না যে, ঐকান্তিক সহজ কঠিন বলিয়া কিছু নাই । সম্ভরণ অপেক্ষা পদব্রজে চলা সহজ বলিয়া মানিয়া লইলেও একথা স্বীকার করিতেই হইবে যে, জলের উপর দিয়া পদব্রজে চলা সহজ নহে—সেখানে তদপেক্ষা সম্ভরণ সহজ । অপ্রত্যক্ষ পদার্থকে মনন দ্বারা জানা অপেক্ষা প্রত্যক্ষ পদার্থকে চক্ষু দ্বারা দেখা সহজ একথা স্বীকার্য কিন্তু তাই বলিয়া অতীন্দ্রিয় পদার্থকে চক্ষু দ্বারা দেখা সহজ নহে—এমন কি, তাহা অসাধ্য । তেমনি সাকার মূর্তির রূপ ধারণা সহজ সন্দেহ নাই কিন্তু সাকার মূর্তির সাহায্যে ব্রহ্মের ধারণা একেবারেই অসাধ্য, কারণ, স বৃক্ষকালাকৃতিভিঃ পরোহন্যঃ তিনি সংসার হইতে কাল হইতে সাকার পদার্থ হইতে শ্রেষ্ঠ এবং ভিন্ন এবং সেই জন্যই তাঁহাতে সংসারাতীত দেশ-কালাতীত শিবং শান্তিমত্যন্তমেতি অত্যন্ত মঙ্গল এবং অত্যন্ত শান্তিলাভ হয় ; অথচ তাঁহাকে পুনশ্চ আকৃতির মধ্যে বদ্ধ করিয়া ধারণা করিবার চেষ্টা এত কঠিন যে তাহা অসাধ্য, অসম্ভব, তাহা স্বতোবিরোধী ।

কিন্তু সহজ কঠিনের কথা উঠে কেন ? আমরা সহজ চাই, না সত্য চাই ? সত্য যদি সহজ হয় ত ভাল, যদি না হয় তবু সত্য বই গতি নাই । পৃথিবী কূর্মের পৃষ্ঠে প্রতিষ্ঠিত আছে এ কথা ধারণা করা যদি কাহারও পক্ষে সহজ হয়,

তথাপি বিজ্ঞান-পিপাসু সত্যের মুখ চাহিয়া তাহাকে অশ্র-
 ক্ষেয় বলিয়া অবজ্ঞা করেন । মরু-প্রান্তরের মধ্যে ভ্রাম্যমান
 ক্ষুধার্ত যখন অন্ন চায়, তখন তাহাকে ষালুকাপিও আনিয়া
 দেওয়া সহজ—কিন্তু সে বলে আমি ত সহজ চাই না, আমি
 অন্নপিও চাই—সে অন্ন এখানে যদি না পাওয়া যায়, তবে
 দুগ্ধ হইলেও তাহাকে অল্পত্র হইতে আহরণ করিতে
 হইবে, নহিলে আমি বাঁচিব না । তেমনি সংসার মধ্যে
 আমরা যখন অধ্যাত্ম-পিপাসা মিটাইতে চাই তখন কল্পনা-
 মরীচিকায় সে কিছুতেই মিটে না—যত দুর্লভ হউক সেই
 পিপাসার জল—আত্মার একমাত্র আকাঙ্ক্ষণীয় পরমাত্মাকেই
 চাই—তিনি নিরাকার নির্বিকার বাক্যমনের অগোচর
 হইলেও তবু তাঁহাকেই চাই, নহিলে আমাদের মুক্তি নাই ।
 ধর্মপথ ত সহজ নহে, ব্রহ্মলাভ ত সহজ নহে, সে কথা
 সকলেই বলে—দুর্গং পথস্তৎ কবয়ো বদন্তি—সেই জন্মই
 মোহনিদ্রাগ্রস্ত সংসারীর দ্বারে দাঁড়াইয়া ঋষি উচ্চস্বরে
 ডাকিতেছেন—“উত্তিষ্ঠত, জাগ্রত”—না উঠিলে না জাগিলে
 এই ক্ষুরধার-নিশিত দুর্গম দুরতায় পথে চক্ষু মুদিয়া চলা
 যায় না, আত্মার অভাব আলস্যভরে অনায়াসে মোচন হয়
 না—এবং ব্রহ্ম ক্রীড়াচ্ছলে কল্পনাবাহিত মনোরথের গম্য
 নহেন । সংসারে যদি বিছালাভ, বিত্তলাভ, যশোলাভ
 সহজ না হয়,—তবে ধর্মলাভ, সত্যলাভ, ব্রহ্মলাভ সহজ,
 এমন আশ্বাস কে দিবে এবং সে আশ্বাসে কে ভুলিবে !

কোন মূঢ় বিশ্বাস করিবে যে, মস্ত্রোচ্চারণে লোহা সোনা হইয়া যাইবে, খনি অবেষণের প্রয়োজন নাই ? উত্তীর্ণত, জাগ্রত ! দুর্গং পথস্তং কবরো বদন্তি !

তবে ব্রহ্মলাভের চেষ্টা কি একেবারে পরিত্যাগ করিতে হইবে ? তবে কি এই কথা বলিয়া মনকে বুঝাইতে হইবে যে, যাহারা সংসার ত্যাগ করিয়া অরণ্য আশ্রয় গ্রহণ করেন, যাহাদের নিকট ভালমন্দ সুন্দর কুৎসিত অন্তর বাহিরের ভেদ একেবারে ঘুচিয়া গেছে ব্রহ্মজ্ঞান ব্রহ্মোপাসনা তাঁহাদেরই জগৎ ? তাই যদি হইবে তবে ব্রহ্মবাদী ঋষি ব্রহ্মচারী ব্রহ্মজিজ্ঞাসু শিষ্যকে কেন অনুশাসন করিতেছেন প্রজাতন্ত্রং মা ব্যবচ্ছেৎসীঃ, সন্তানসূত্র ছেদন করিবে না, অর্থাৎ গৃহ্যশ্রমে প্রবেশ করিবে। কেন শাস্ত্রকার বিশেষ করিয়া উপদেশ দিতেছেন, ব্রহ্মনিষ্ঠো গৃহস্থঃ স্যাৎ, গৃহস্থ ব্যক্তি ব্রহ্মনিষ্ঠ হইবেন ; এবং তত্ত্বজ্ঞান পরায়ণঃ, তত্ত্বজ্ঞানী হইবেন, অর্থাৎ যে নিষ্ঠার কথা कहিলেন তাহা যেন অজ্ঞান-নিষ্ঠা না হয়, গৃহী যথার্থ জ্ঞান পূর্বক ব্রহ্মে নিরন্ত হইবেন, এবং ষড়্বদ্ কৰ্ম প্রকুর্বীত তত্ত্বজ্ঞানি সমৰ্পয়েৎ যে যে কৰ্ম করিবেন তাহা ব্রহ্মে সমৰ্পণ করিবেন ;—অতএব শাস্ত্রের অনুশাসন এই যে, গৃহী ব্যক্তিকে কেবল ভক্তিতে নহে, জ্ঞানে, কেবল জ্ঞানে নহে, কৰ্মে, হৃদয়ে মনে এবং চেষ্টায় সৰ্ব্বতোভাবে ব্রহ্মপরায়ণ হইতে হইবে। অতএব সংসারের মধ্যে থাকিয়া আমরা সৰ্ব্বদা সৰ্ব্বত্র ব্রহ্মের

সত্তা উপলব্ধি করিব, অন্তরাঙ্গার মধ্যে তাঁহার অধিষ্ঠান, অনুভব করিব এবং আমাদের সমুদয় কর্ম তাঁহার সম্মুখে কৃত এবং তাঁহার উদ্দেশে সমর্পিত হইবে ।

কিন্তু সর্বদা সর্বত্র তাঁহার সত্তা উপলব্ধি করিতে হইলে, চতুর্দিকের জড়বস্তুরাশিকে অপসারিত করিয়া ব্রহ্মের মধ্যেই আপনাকে সম্পূর্ণ আশ্রিত আবৃত নিমগ্ন অনুভব করিতে হইলে তাঁহাকে সাকাররূপে কল্পনাই করা যায় না । উপনিষদে আছে, যদিদং কিঞ্চ জগৎ সর্বং প্রাণ এজতি নিঃসৃতং—এই সমস্ত জগৎ সেই প্রাণ হইতে নিঃসৃত হইয়া সেই প্রাণের মধ্যে কল্পিত হইতেছে । অনন্ত প্রাণের মধ্যে সমস্ত বিশ্বচরাচর অহনিশি স্পন্দমান রহিয়াছে এই ভাব কি আমরা কোন প্রকার হস্তপদবিশিষ্ট মূর্ত্তি দ্বারা কল্পনা করিতে পারি ? অথচ যদিদং কিঞ্চ জগৎ সর্বং প্রাণ এজতি, এই যাহা কিছু জগৎ সমস্ত প্রাণের মধ্যে কল্পিত হইতেছে একথা মনে উদয় হইবামাত্র তৎক্ষণাৎ তৃণশুল্কতা-পুষ্পপল্লব পশুপক্ষী মনুষ্য চন্দ্রসূর্য্যগ্রহনক্ষত্র, জগতের প্রত্যেক কল্পমান অণু পরমাণু এক মহাপ্রাণের ঐক্যসমুদ্রে হিল্লোলিত দেখিতে পাই—এক মহাপ্রাণের অনন্ত-কল্পিত বীণাতন্ত্রী হইতে এই বিপুল বিচিত্র বিশ্ব-সঙ্গীত বহুত শুনিতে পাই । অনন্তপ্রাণের সেই অনির্দেশ্যতা অনির্কচনীয়াতাই আমাদের চিত্তকে প্রসারিত করিয়া দেয় । সেই জগদ্ব্যাপী জগদতীত প্রাণকে কোন নির্দিষ্ট সঙ্গীর্ণ আকারের মধ্যে

কল্পনা করিতে গেলে তখন আর তাঁহাকে আমাদের নিঃখাসের মধ্যে পাই না, আমাদের চক্ষের নিমেষের মধ্যে পাই না, আমাদের রক্তের উত্তপ্ত প্রবাহ, আমাদের সর্বাঙ্গের বিচিত্র স্পর্শ, আমাদের দেহের প্রত্যেক স্পন্দিত কোষ, প্রত্যেক নিঃখাসিত রোমকূপের মধ্যে পাই না ; আকৃতির কঠিন ব্যবধানে, মূর্তির অলঙ্ঘনীয় অন্তরালে তিনি আমাদের নিকট হইতে আমাদের অন্তর হইতে দূরে বাহিরে গিয়া পড়েন । আমার অশরীরী অভাবনীয় প্রাণ আমার আদ্যোপান্তে অথগুভাবে পরিব্যাপ্ত হইয়া আছে, আমার পদাঙ্গুলির কোষাণুর সহিত আমার মস্তিষ্কের কোষাণুকে যোগযুক্ত করিয়া রাখিয়াছে,—আবার আমার এই বহুশস্য প্রাণের মধ্যে সেই পরমপ্রাণ আমার শরীরকোষের প্রত্যেক স্পন্দনের সহিত সুদূরতম নক্ষত্রবর্তী বাষ্পাণুর প্রত্যেক আন্দোলনকে এক অনির্কচনীয় ঐক্যে এক অপূর্ব অপরিমেয় ছন্দোবন্ধনে আবদ্ধ করিয়াছেন, ইহা অনুভব করিয়া এবং অনুভবের শেষ করিতে না পারিয়া কি আমাদের চিত্ত পুনর্কিত প্রসারিত হইয়া উঠে না ? কোনও মূর্তির কল্পনা কি ইহা অপেক্ষা সহজে আমাদের সর্বপ্রকার জুড়তার বন্ধন, খণ্ডতার কারাপ্রাচীর হইতে মুক্তিদানে সহায়তা করিতে পারে, অনন্তের সহিত আমাদের এমন অন্তরতম ব্যাপকতম যোগ সংনিবদ্ধ করিতে পারে ? সাকার মূর্তি আমাদের সহায়তা করে না, ব্রহ্মকে দূরে লইয়া হুত্ৰাপ্য করিয়া দেয় ।

যদা হেঁবেষ এতস্মিন্ অদৃশ্চেহনাঅ্যোহনিক্কেহনিলয়নে
অভয়ং প্রতিষ্ঠাং বিকতে অথ সোহভয়ংগতো ভবতি—

যখন সাধক সেই অদৃশ্চে, অশরীরে, নির্বিশেষে, নিরা-
ধারে অভয় প্রতিষ্ঠা লাভ করেন তখন তিনি অভয় প্রাপ্ত
হন ।

যদা হেঁবেষ এতস্মিন্মু দরমস্তরং কুরুতে অথ তশ্চ ভয়ং
ভবতি—

কিন্তু যখন তিনি ইহা^{১৩} লেশমাত্র অন্তর অর্থাৎ দূরত্ব
স্থাপন করেন তখন তিনি ভয় প্রাপ্ত হন । সেই অদৃশ্চকে
দৃশ্চ, অশরীরকে শরীরী, নির্বিশেষকে সবিশেষ এবং নিরা-
ধারকে আধার-বিশিষ্ট করিলে ব্রহ্মের সহিত দূরত্ব স্থাপন
করা হয় এবং তখন আমাদের আত্মার অভয় প্রতিষ্ঠা চূর্ণ
হইয়া যায় ।

উপনিষৎ বলিতেছেন—

অস্তুীতি ক্রবতোহগ্নত্র কথং তদুপলভ্যতে ।

তিনি আছেন এই কথা যে বলে সে ছাড়া অগ্নি ব্যক্তি
তাঁহাকে কি করিয়া উপলব্ধি করিবে? তিনি আছেন
ইহার অধিক আর কি বলিবার আছে? তিনি আছেন
একথা যখনি আমরা সর্কান্তঃকরণে সম্পূর্ণভাবে বলিতে
পারি তখনই আমাদের মনোনেত্রের সম্মুখে অনন্ত শূন্য
ওতপ্রোত পরিপূর্ণ হইয়া উঠে—তখনি ষথার্থকঃ বুঝিতে
পারি যে, আমি আছি, বুঝিতে পারি যে, আমার বিনাশ

নাই, আত্ম ও পর জড় ও চেতন, দেশ ও কাল নিকল পরমাত্মার দ্বারা এক মুহূর্ত্তেই অথগুভাবে উদ্দীপ্ত হইয়া উঠে ; তখন আমাদের এই পুরাতন পৃথিবীর দিকে চাহিলে ইহাকে আর ধূলিপিণ্ড বলিয়া বোধ হয় না, নিশীথ নভো-মণ্ডলের নক্ষত্রপুঞ্জের দিকে চাহিলে তাহারা শুক্রমাত্র অগ্নিফুলিঙ্গরূপে প্রতীয়মান হয় না, তখন আমার অন্তরাত্মা হইতে আরম্ভ করিয়া ধূলিকণা, এই ভূমিতল হইতে আরম্ভ করিয়া নক্ষত্রলোক পর্য্যন্ত একটি শব্দ ধ্বনিহীন গান্ধীর্ঘ্যে উদ্দীপ্ত হইয়া উঠে—ওঁ,—একটি বাক্য শুনিতে পাই— অস্তি, তিনি আছেন—এবং সেই একটি কথার মধ্যেই সমস্ত জগৎচরাচরের, সমস্ত কার্য্য কারণের সমস্ত অর্থ নিহিত পাওয়া যায় । সেই মহান্ অস্তি শব্দকে কোনও আকারের দ্বারা মূর্ত্তি দ্বারা সহজ করা যায় কি ? এমন সহজ কথা কি আর কিছু আছে যে তিনি আছেন ? আমি আছি এ কথা যেমন জগতের সকল কথার অপেক্ষা সহজ তিনি আছেন এ কথা না বলিলে আমি আছি এ কথা যে আদ্যোপান্ত নিরর্থক মিথ্যা হইয়া যায় । আমার অস্তিত্ব বলিতেছে, আমার আত্মা বলিতেছে তিনি আছেন, সাকার মূর্ত্তি কি তদপেক্ষা সহজ সাক্ষ্য আর কিছু দিতে পারে ?

ব্রহ্মের সেই বিশুদ্ধ ভাব কিরূপে মনন করিতে হইবে ?

নৈনমূর্দ্ধং ন তির্য্যকং ন মধ্যে পরিজগ্রভং

ন তস্মা প্রতিমা অস্তি যস্মা নাম মহদ্ব্যশঃ ।

কি উর্দ্ধদেশ, কি তিৰ্য্যক্, কি মধ্যদেশ কেহ ইহাকে গ্রহণ করিতে পারে না—তাহার প্রতিমানাই, তাহার নাম মহদ্বশ !

প্রাচীন ভারতে সংসারবাসী জীবাশ্মার লক্ষ্যস্থান এই পরমাশ্মাকে বিদ্ধ করিবার মন্ত্র ছিল—ঔ ।

প্রণবোধনুঃ শরোহাত্মা ব্রহ্মতল্লক্ষ্যমুচ্যতে ।

তাহার প্রতিমা ছিল না, কোন মূর্ত্তিকল্পনা ছিল না—পূৰ্ব্বতন পিতামহগণ তাহাকে মনন করিবার জন্ত সমস্ত পরিত্যাগ করিয়া একটিমাত্র শব্দ আশ্রয় করিয়াছিলেন। সে শব্দ যেমন সংক্ষিপ্ত, তেমনি পরিপূর্ণ, কোন বিশেষ অর্থ দ্বারা সীমাবদ্ধ নহে। সেই শব্দ চিন্তকে ব্যাপ্ত করিয়া দেয়, কোন বিশেষ আকার দ্বারা বাধা দেয় না; সেই একটি মাত্র ঔ শব্দের মহাসঙ্গীত জগৎসংসারের ব্রহ্মরন্ধু হইতে যেন ধ্বনিত হইয়া উঠিতে থাকে।

ব্রহ্মের বিশুদ্ধ আদর্শ রক্ষা করিবার জন্ত পিতামহগণ কিরূপ যত্নবান ছিলেন ইহা হইতেই তাহার প্রমাণ হইবে।

চিন্তার যতপ্রকার চিহ্ন আছে তন্মধ্যে ভাবাই সৰ্ব্বাপেক্ষা চিন্তার অনুগামী। কিন্তু ভাবারও সীমা আছে, বিশেষ অর্থের দ্বারা সে আকারবদ্ধ—সুতরাং ভাবা আশ্রয় করিলে চিন্তাকে ভাবাগত অর্থের চারি প্রান্তের মধ্যে রুদ্ধ থাকিতে হয়।

ঔ একটি ধ্বনিমাত্র—তাহার কোন বিশেষ নির্দিষ্ট অর্থ নাই। সেই ঔ শব্দে ব্রহ্মের ধারণাকে কোন অংশেই সীমাবদ্ধ করে না—সাধনা দ্বারা আমরা ব্রহ্মকে যতদূর জানিয়াছি

যেমন করিয়াই পাইয়াছি এই ঔ শব্দে তাহা সমস্তই ব্যক্ত করে—এবং ব্যক্ত করিয়াও সেইখানেই রেখা টানিয়া দেয় না। সঙ্গীতের স্বর যেমন গানের কথার মধ্যে একটি অনির্কচনীয়াতার সঞ্চারণ করে তেমনি ঔ শব্দের পরিপূর্ণ ধ্বনি আমাদের ব্রহ্মধ্যানের মধ্যে একটি অনির্কচনীয়াতা অবতারণা করিয়া থাকে। বাহ্য প্রতিমা দ্বারা আমাদের মানস ভাবকে খর্ব ও আবদ্ধ করে—কিন্তু এই ঔ ধ্বনির দ্বারা আমাদের মনের ভাবকে উন্মুক্ত ও পরিব্যাপ্ত করিয়া দেয়।

সেইজ্ঞান উপনিষদ বলিয়াছেন—ওমিতি ব্রহ্ম। ওম্ বলিতে ব্রহ্ম বুঝায়। ওমিতীদং সর্বং, এই যাহা কিছু সমস্তই ঔ। ঔ শব্দ সমস্তকেই সমাচ্ছন্ন করিয়া দেয়। অর্থবন্ধনহীন কেবল একটি সুগম্ভীর ধ্বনিক্রম ঔ শব্দ ব্রহ্মকে নির্দেশ করিতেছে। আবার ঔ শব্দের একটি অর্থও আছে—সে অর্থ এত উদার যে তাহা মনকে আশ্রয় দান করে অথচ কোন সীমায় বদ্ধ করে না।

আধুনিক সমস্ত ভারতবর্ষীয় আৰ্য্য ভাষায় যেখানে আমরা হাঁ বলিয়া থাকি প্রাচীন সংস্কৃত ভাষায় সেইখানে ঔ শব্দের প্রয়োগ। হাঁ শব্দ ঔ শব্দেরই রূপান্তর বলিয়া সহজেই অনুমিত হয়। উপনিষদও বলিতেছেন ওমিত্যেতদ্ অনুকৃতির্হস্ম— ঔ শব্দ অনুকৃতিবাচক, অর্থাৎ ইহা কর বলিলে, ঔ অর্থাৎ হাঁ বলিয়া সেই আদেশের অনুকরণ করা হইয়া থাকে। ঔ স্বীকারোক্তি।

এই স্বীকারোক্তি ঔ, ব্রহ্ম-নির্দেশক শব্দরূপে গণ্য হই-
য়াছে। ব্রহ্মধ্যানের কেবল এইটুকু মাত্র অবলম্বন—ঔ,
তিনি হাঁ। ইংরাজ মনীষী কার্লাইলও তাঁহাকে Everlasting
Yay অর্থাৎ শাস্ত ঔ বলিয়াছেন। এমন প্রবল পরিপূর্ণ
কথা আর কিছুই নাই, তিনি হাঁ, ব্রহ্ম ঔ।

আমরা কে কাহাকে স্বীকার করি সেই বুঝিয়া আত্মার
মহত্ব। কেহ জগতের মধ্যে একমাত্র ধনকেই স্বীকার করে,
কেহ মানকে, কেহ খ্যাতিকে। আদিম আর্গ্যাপণ ইন্দ্র চন্দ্র
বরুণকে ঔ বলিয়া স্বীকার করিতেন, সেই দেবতার অস্তি-
ত্বই তাঁহাদের নিকট সর্বশ্রেষ্ঠ বলিয়া প্রতিভাত হইত।
ঔপনিষদের ঋষিগণ বলিলেন জগতে ও জগতের বাহিরে
ব্রহ্মই একমাত্র ঔ তিনিই চিরন্তন হাঁ, তিনিই Everlasting
Yay। আমাদের আত্মার মধ্যে তিনি ঔ, তিনিই হাঁ,—
বিশ্বব্রহ্মাণ্ডের মধ্যে তিনি ঔ, তিনিই হাঁ, এবং বিশ্বব্রহ্মাণ্ড
দেশ-কালকে অতিক্রম করিয়া তিনি ঔ, তিনিই হাঁ।
এই মহৎ নিত্য এবং সর্বব্যাপী বে হাঁ, ঔ ধ্বনি
ইহাকেই নির্দেশ করিতেছে। প্রাচীন ভারতে ব্রহ্মের
কোন প্রতিমা ছিল না, কোন চিহ্ন ছিল না—কেবল
এই একটি মাত্র ক্ষুদ্র অক্ষর সুরহং ধ্বনি ছিল ঔ।
এই ধ্বনির সহায়ে ঋষিগণ উপাসনানিশিত আত্মাকে
একাগ্রগামী শব্দের ন্যায় ব্রহ্মের মধ্যে নিমগ্ন করিয়া
দিতেন। এই ধ্বনির সহায়ে ব্রহ্মবাদী সংসারীগণ

বিশ্বজগতের যাহা কিছু সমস্তকেই ব্রহ্মের দ্বারা সমাবৃত
করিয়া দেখিতেন ।

ওমিতি সামানি গায়ন্তি । ঔ বলিয়া সাম সকল গীত
হইয়া থাকে । ঔ আনন্দধ্বনি ।

ওমিতি ব্রহ্মা প্রসৌতি । ঔ আদেশবাচক । ঔ বলিয়া
ঋত্বিক আজ্ঞা প্রদান করেন । সমস্ত সংসারের উপর আমা-
দের সমস্ত কর্মের উপর মহৎ আদেশরূপে নিত্যকাল ঔ
ধ্বনিত হইতেছে । জগতের অভ্যন্তরে এবং জগৎকে অতি-
ক্রম করিয়া যিনি সকল সত্যের পরম সত্য—আমাদের
হৃদয়ের মধ্যে তিনি সকল আনন্দের পরমানন্দ, এবং আমাদের
কর্মসংসারে তিনি সকল আদেশের পরমাদেশ । তিনি ঔ ।

ন তত্র সূর্যোভাতি ন চন্দ্রতারকং
নেমা বিদ্যাতোভাস্তি কুতোহয়মগ্নিঃ,
তমেব ভাস্তমনুভাতি সর্বং
তশ্চ ভাষা সর্বমিদং বিভাতি ।

তিনি যেখানে সেখানে সূর্যের প্রকাশ নাই, চন্দ্র তারকের
প্রকাশ নাই, বিদ্যাতের প্রকাশ নাই, এই অগ্নির প্রকাশ
কোথায় ? সেই জ্যোতির্ময়ের প্রকাশেই সমস্ত প্রকাশিত,
তঁাহার দীপ্তিতেই সমস্ত দীপ্যমান । তিনিই ঔ ।

তদেতৎ প্রেয়ঃ পুত্রাৎ প্রেয়োবিভাৎ
প্রেয়োহন্যস্মাৎ সর্বস্মাৎ অন্তরতরং বদয়মাশ্বা ।

এই যে অন্তরতর পরমাত্মা তিনি পুত্র হইতে প্রিয়, বিত্ত হইতে প্রিয়, সকল হইতেই প্রিয় । তিনিই ঔ ।

সত্যান্ন প্রমদিতব্যং ।

ধর্ম্মান্ন প্রমদিতব্যং ।

কুশলান্ন প্রমদিতব্যং ।

ভূতৈর্ন প্রমদিতব্যং ।

সত্য হইতে স্থলিত হইবে না, ধর্ম্ম হইতে স্থলিত হইবে না, কল্যাণ হইতে স্থলিত হইবে না, মহত্ব হইতে স্থলিত হইবে না । ইহা ঐহার অনুশাসন তিনিই ঔ ।

(অনেকে বলেন, দুর্ব্বল মানবপ্রকৃতির সর্ব্বপ্রকার চরিত্তার্থতা আমরা ঈশ্বরে পাইতে চাই; আমাদের প্রেম কেবল জ্ঞানে ও ধ্যানে পরিতৃপ্ত হয় না, সেবা করিতে চায়; আমাদের প্রকৃতির সেই স্বাভাবিক আকাঙ্ক্ষা চরিত্তার্থ করিবার জন্ত আমরা ঈশ্বরকে মূর্ত্তিতে বদ্ধ করিয়া তাঁহাকে অশন বসন ভূষণ উপহারে পূজা করিয়া থাকি ।)

(এ কথা সত্য যে, ব্রহ্মের মধ্যে আমরা মানব প্রকৃতির চরম চরিত্তার্থতা অন্বেষণ করি; কেবল ভক্তি ও জ্ঞানের দ্বারা সেই চরিত্তার্থতা লাভ হইতে পারে না, সেই জন্তই শাস্ত্রে গৃহস্থকে ব্রহ্মনিষ্ঠ ও ব্রহ্মজ্ঞানী হইতে বলিয়াছেন এবং সেই সঙ্গে বলিয়াছেন, গৃহী যে যে কর্ম্ম করিবেন তাহা ব্রহ্মকে সমর্পণ করিবেন । সংসারের সমস্ত কর্ত্তব্যপালনই ব্রহ্মের সেবা । যদি প্রতিমাকে অন্নবস্ত্র পুষ্পচন্দন দান করিয়া

আমরা দেবসেবার আকাজকা চরিতার্থ করি তবে তাহাতে আমাদের কর্মের মহত্ব লাভ না হইয়া ঠিক তাহার বিপরীত হয় । ব্রহ্মজ্ঞানে আমাদের সকল জ্ঞানের চরিতার্থতার দিকে লইয়া যায়, ব্রহ্মের প্রতি প্রীতি আমাদের পুত্র-প্রীতি ও অন্ত সকল প্রীতির পরম পরিতৃপ্তিতে লইয়া যায়, এবং ব্রহ্মের কর্ম ও সেইরূপ আমাদের শুভ চেষ্টাকে চরম মহত্ব ও উদার্যের অভিমুখে আকর্ষণ করে । আমাদের জ্ঞান, প্রেম ও কর্মের এইরূপ মহত্ব সাধনের জন্যই মনু গৃহীকে ব্রহ্মপরায়ণ হইতে উপদেশ দিয়াছেন । মানবপ্রকৃতির যথার্থ চরিতার্থতা তাহাতেই ভোগে নহে, খেলায় নহে । প্রতিমাকে স্নান করাইয়া বস্ত্র পরাইয়া অন্ন নিবেদন করিয়া, আমাদের কর্ম-চেষ্টার কোন মহৎ পরিতৃপ্তি হইতেই পারে না, তাহাতে আমাদের কর্তব্যের আদর্শকে তুচ্ছ ও সফীর্ণ করিয়া আনে । ভক্তি ও প্রীতির উদারতা অনুসারে কর্মেরও উদারতা ঘটয়া থাকে । পরিবারের প্রতি যাহার যে পরিমাণে প্রীতি সে পরিবারের জন্ত সেই পরিমাণে প্রাণ পাত করিয়া থাকে । দেশের প্রতি যাহার ভক্তি, দেশের সর্বপ্রকার দৈন্ত ও কলঙ্ক মোচনের জন্য বিবিধ দুর্কর চেষ্টায় প্রবৃত্ত হইয়া সে আপন ভক্তির স্বাভাবিক চবিতার্থতা সাধন করিয়া থাকে । ব্রহ্মের প্রতি যাহার গভীর নিষ্ঠা, সে, পরিবারের প্রতি, প্রতিবেশীর প্রতি, দেশের প্রতি, সকলের প্রতি মঙ্গল-চেষ্টা নিয়োগ করিয়া ভক্তিবৃত্তিকে

সফলতা দান করে। দীনকে বন্দনান, কুধিতকে অন্নদান ইহাতেই আমাদের সেবাচেষ্টার মার্থকতা। প্রতিমার সন্মুখে অন্ন বস্ত্র উপহারণ করা ক্রীড়ামাত্র, তাহা কৰ্ম নহে, তাহা ভক্তিবৃত্তির মোহাচ্ছন্ন বিলাসমাত্র, তাহা ভক্তিবৃত্তির সূচেষ্ট সাধনা নহে। এই খেলার যদি আমাদের মুগ্ধ হৃদ-
য়ের কোন সুখ সাধন হয় তবে সেত আমাদের আত্মসুখ,
আমাদের আত্ম-সেবা, তাহাতে দেবতার কৰ্মসাধন হয়
না। আমাদের জীবনের প্রত্যেক ইচ্ছাকৃত কৰ্ম নিজের
সুখের জন্য না করিয়া ঈশ্বরের উদ্দেশে করা এবং তাহা-
তেই সুখানুভব করা দেবসেবার উচ্চ আদর্শ। সেই
আদর্শকে রক্ষা করিতে হইলে জড় আদর্শকে পরিত্যাগ
করিতে হইবে।

সত্যজ্ঞান ছরুহ, প্রকৃত নিষ্ঠা ছরুহ, মহৎ কৰ্মানুষ্ঠান
ছরুহ সন্দেহ নাই, তাই বলিয়া তাহাকে লঘু করিয়া, বার্থ
করিয়া, মিথ্যা করিয়া, মনুষ্যত্বের অবমাননা করিয়া আমরা
কি ফল লাভ করিয়াছি? কৰ্তব্যকে খৰ্স করিবার অভি-
প্রায়ে, জ্ঞান ভক্তি কৰ্মকে, মানব প্রকৃতির সর্বোচ্চ
শিখরকে কয়েক খণ্ড যুৎপিণ্ডে পরিণত করিয়া খেলা করিতে
করিতে আমরা কোনখানে আসিয়া উপনীত হইয়াছি!
আমরা নিজেকে অক্ষম অশক্ত নিকৃষ্ট অধিকারী বলিয়া
স্বীকার করিয়া নিশ্চেষ্ট জড়ত্বকে আনন্দে বরণ করিয়া
লইয়াছি। আমরা অকুণ্ঠিত স্বরে নিজেকে আধ্যাত্মিক

শিশু বলিয়া প্রচার করি, এবং সর্বপ্রকার মনুষ্যোচিত কঠিন সাধনা ও মহৎপ্রয়াস হইতে নিষ্কৃতি, জ্ঞানীর নিকট হইতে মার্জনা ও ঈশ্বরের নিকট হইতে প্রশ্রয় প্রত্যাশা পূর্বক নিদ্রা, ক্রৌড়া ও উচ্ছ্বাল কল্পনার দ্বারা সুখলালিত হইয়া নিস্তেজ নিব্বীৰ্য্য হইতে থাকি; যুক্তিকে পঙ্গু করিয়া, ভক্তিকে অন্ধ করিয়া, আত্মপ্রত্যয়কে আচ্ছন্ন করিয়া, ব্রহ্মকে চিন্তা ও চেষ্টা হইতে দূরীভূত করিয়া, হৃদয় মন আত্মার মধ্যে আলস্য এবং পরাধীনতার সহস্রবিধ বীজ বপন করিয়া আমরা জাতীয় হ্রগতির শেষ সোপানে আসিয়া অবতীর্ণ হইয়াছি। অন্য আমরা ভয়ে ভীত, দীনতায় অবনত, শোক তাপে জর্জর। আমরা বিচ্ছিন্ন, বিধ্বস্ত, হীন বল। আমাদের বাহিরে লাঞ্ছনা, অন্তরে ধানি, চতুর্দিকেই জীর্ণতা। আমাদের বাহিরে জাতিতে জাতিতে, বর্ণে বর্ণে, সম্প্রদায়ে সম্প্রদায়ে যেরূপ বিচ্ছেদ, আমাদের নিজের প্রকৃতির মধ্যে আমাদের “চিন্তে বাচি ক্রিয়ামাং” মনে বাক্যে ও কর্মে বিরোধ, শিকায় ও আচরণে বিরোধ, ধর্মে এবং কর্মে ঐক্য নাই—সেই কাপুরুষতায় এবং বিচ্ছিন্নতায় আমাদের সমাজ আমাদের গৃহ আমাদের অন্তঃকরণ অসত্যে আদ্যোপান্ত জর্জরীভূত হইয়াছে। আমরাগকে এক হইতে হইবে, সতেজ হইতে হইবে, ভয়হীন হইতে হইবে। অজ্ঞান এবং অন্যায়ের বিরুদ্ধে আমরা উন্নতশিরে দণ্ডায়মান হইব। কে আমাদের বল, কে আমাদের আশ্রয়? সে কোন্

সর্বব্যাপী সত্য, কোন্ অদ্বিতীয় এক, যিনি আমাদের জ্ঞাতিতে জ্ঞাতিতে 'ভ্রাতায় ভ্রাতায় মনে বাক্যে ও কর্মে একতা দান করিবেন? সংসারের মধ্যে আমরা লোকভয়-মৃত্যুভয়জয়ী পরম নির্ভর পাই নাই; সংসার গুরুভার লৌহ-শৃঙ্খলে আমাদের অবমানিত মস্তককে আরও অবনত করিয়া রাখিয়াছে, আমাদের জড় হৃৎকল দেহকে আরও গতিশক্তিবিহীন করিয়াছে। এই সকল ভয় এবং ভার এবং ক্ষুদ্রতা হইতে ব্রহ্মই আমাদের একমাত্র মুক্তি। দিনে রাত্রে স্থপ্তিতে জাগরণে অন্তরে বাহিরে আমরা তাঁহার মধ্যে আবৃত নিমগ্ন থাকিয়া তাঁহার মধ্যে মগ্নরূপে করিতেছি—কোন প্রবল রাজা, কোন পরম শত্রু কোন প্রচণ্ড উপদ্রবে তাঁহা হইতে আমাদের বিচ্ছিন্ন করিতে পারিবে না। অতঃপর আমরা সমস্ত ভীত বিকৃত ভারতবর্ষ কি এক হইয়া করযোড়ে উর্দ্ধমুখে বলিতে পারি না যে,—

অজাত ইত্যেবং কশ্চিদ্ভীকঃ প্রতিপদ্যতে ।

রুদ্র যন্তে দক্ষিণং মুখং তেন মাং পাহি নিত্যং ।

তুমি অজাত, জন্মরহিত, কোন ভীকু তোমার শরণাপন্ন হইতেছে, হে রুদ্র তোমার যে প্রসন্ন মুখ তাহার দ্বারা আমাকে সর্বদা রক্ষা কর। তিনি রহিয়াছেন—ভয় নাই, ভয় নাই! সম্মুখে যদি অজ্ঞান থাকে তবে দূর কর, অন্যায় থাকে তবে আক্রমণ কর, অন্ধ সংস্কার বাধাস্বরূপ থাকে তবে তাহা সবলে ভগ্ন করিয়া ফেল; কেবল তাঁহার

মুখের দিকে চাও এবং তাঁহার কৰ্ম কর । তাহাতে যদি কেহ অপবাদ দেয় তবে সে অপবাদ সলাটের তিলক করিয়া লও ; যদি ছঃখ ঘটে সে ছঃখ মুকুটরূপে শিরোধার্য্য করিয়া লও ; যদি মৃত্যু আসন্ন হয় তবে তাহাকে অমৃত বলিয়া গ্রহণ কর ! অক্ষয় আশায়, অক্ষয় বলে, অনন্ত প্রাণের আশ্বাসে, ব্রহ্ম-সেবার পরম গৌরবে সংসারের সৰ্ব্বট পুণ্ড্রে সৰল হৃদয়ে ঈজু দেহে চলিয়া যাও ! স্থখের সময় বল, অস্তি—তিনি আছেন, দুঃখের সময় বল, অস্তি—তিনি আছেন, বিপদের সময় বল, অস্তি—তিনি আছেন ! পর-মাত্মার মধ্যে আত্মার অবাধ স্বাধীনতা, অপরিণীম আনন্দ, অপরাঙ্কিত অভয় লাভ করিয়া সমস্ত অপমান দৈন্য মানি নিঃশেষে প্রক্ষালিত করিয়া কেল ! বল, যে মহান অক্ষ আত্মা হইতে বাক্য মন নিবৃত্ত হইয়া আসে আমি সেইখান হইতে আনন্দ লাভ করিয়াছি, আমি কদাচ ভয় করি না, আমি কাহা হইতেও ভয় পাই না—আমার ন জরা, ন মৃত্যু শোকঃ । বল—

ঔ আপ্যায়ন্তু মমাজানি-বাক্‌প্রাণশ্চকুঃশ্রোত্রমথো

বলমিজ্জিগ্মসি চ সর্কাসি সর্কসং ব্রহ্মোপনিষদং ।

মাহং ব্রহ্ম নিরাকুর্য্যাং মামা ব্রহ্ম নিরাকরোং

অনিরাকরণমস্ত অনিরাকরণং মেহস্ত ।

তদাত্মনি নিরতে য উপনিষৎসু ধর্মাঃ

তে মসি সন্ত তে মসি সন্ত ॥

উপনিষৎ-কথিত সর্কাস্তুর্যামী ব্রহ্ম আমার বাক্য প্রাপ্ত
 চক্ষু শ্রোত্র বল ইঞ্জির, আমার সমুদয় অঙ্গকে পরিতৃপ্ত করুন।
 ব্রহ্ম আমাকে পরিত্যাগ করেন নাই, আমি ব্রহ্মকে পরি-
 ত্যাগ না করি, তিনি অপরিত্যক্ত থাকুন, তিনি আমা-কর্তৃক
 অপরিত্যক্ত থাকুন। সেই পরমাত্মার নিরন্তর আমাতে উপ-
 নিষদের যে সকল ধর্ম তাহাই হোক, আমাতে তাহাই
 হোক !

ওঁ শান্তিঃ শান্তিঃ শান্তিঃ । হরি ঐ ।
